

19. oktober 2007

UKA 2007/32

**Pappiaqqanik nalilinnik naqissusiinermi akitsuut pillugu Inatsisartut
inatsisaata allangortinneqarneranik Inatsisartut inatsisaattut siunnersuut.
(Naqissusiinermut akitsuuserneqannginnissaq)**

pillugu

Inatsisartut Akileraartarnermut Akitsuusiisarnermullu Ataatsimiititaliaa

ISUMALIUTISSIISSUTAA

Siunnersuutip aappassaaneerpeqarnerani saqqummiunneqartoq

Inatsisartut Akileraartarnermut Akitsuusiisarnermullu Ataatsimiititaliaat
suliarinninnermini ukuninnga inuttaqarpoq:

Inatsisartunut ilaasortaq Kristian Jeremiassen, Atassut (siulittaasoq)
Inatsisartunut ilaasortaq Juliane Henningsen, Inuit Ataqtigiiit
Inatsisartunut ilaasortaq Lene Knüppel, Demokraatit
Inatsisartunut ilaasortaq Ole Thorleifsen, Siumut (sinniisussaq)
Inatsisartunut ilaasortaq Ruth Heilmann, Siumut (sinniisussaq)

UPA 2007-imi siunnersuummik siullermeerinnineq tunngavigalugu inatsisissatut
siunnersuut, inatsisissamut nassuiaatit tusarniaanermilu atortut Inatsisartut
Akileraartarnermut Akitsuusiisarnermullu Ataatsimiititaliaata misissuataarpai.

Tusarniaaneq.

Siunnersuut piffissami 15. marsi – 16. aprili 2007-imi tusarniaassutigineqarluni
nassiunneqarpoq, tamannalu sivikippallaarsorineqarsinnaavoq. Oqaatsit
akissuteqarnermi atorneqaqqaartut atorlugit tusarniaanermi akissutit
Akileraartarnermut Akitsuusiisarnermullu Ataatsimiititaliaamit tiguneqarput.
Tusarniaanermi akissutit inatsimmut nassuiaatini nalinginnaasuni Naalakkersuisunit
oqaaseqaateqarfigineqarput.

Siunnersuutip Inatsisartuni siullermeerneqarnera.

Inatsisartut siullermeerinninneranni inatsisissatut siunnersuut Inatsisartuni partiinit
tamanit ilassilluarneqarpoq. Aningaasaateqarfimmut atugassarititaasut

unammilleqatigiinnermut kipusoortitsisinnaasutut isigineqarsinnaappata Nunat Avannarliit Killiit Aningaasaateqarfianni Kalaallit Nunaata peqataaginnarnissaanut nalornissuteqarnini Kalaallit Nunaanni Sulisitsisut Peqatigiiffianit tusarniaanermut akissutaanut tapiliullugu Atassutip nalunaarutigaa. Pappiaqqanik nalilinnik naqissusiinnermi akitsuut pillugit inatsisip arlaleriarlugu allangortinneqareersimanera Kattusseqatigiit Partiiata ilaatigut uparuarpa.

Aningaasanut Nunanullu Allanut Naalakkersuisoq apeqqutinut siunnersuutip siullermeerneqarnerani saqqummiunneqartunut, pingaartumik inuussutissarsiutigalugu angallatinut qularnaveeqqusiisarneq pisassarisallu kiisalu Nunat Avannarliit Killiit Aningaasaateqarfianni Kalaallit Nunaata peqataanera pillugit akissuteqaammik itisiliissutaasumik allakkatigut 11. oktobari 2007-imeersutigut saqqummiussaqrpoq. Naalakkersuisunut ilaasortap allagai isumaliutissiisummut matumunnga **ilanngussaq 1-itut** ilanngunneqarput.

Akilerartarnermut Akitsuusiisarnermullu Ataatsimiititaliap isumaliutai.

Nunat Avannarliit Killiit Aningaasaateqarfiannik taarsigassarsinissamik isumaqatigiissutit akitsuuserneqanginnissaannut tunngatillugu Akilerartarnermut Akitsuusiisarnermullu Ataatsimiititaliap aallarniutigalugu oqaatigissavaa nunat tamalaat akornanni isumaqatigiissut ersarissoq aqutugalugu Kalaallit Nunaat tamatumunnga pisussaaffilerneqarsimmat. Aammattaaq inatsit tamatumuunakkut periaatsinik allanguinissamik nassataqassanngitsoq, inatsisitigulli inissisimanermik atuuttumik erseqqissaataaginnassasoq ataatsimiititaliap eqqaasitsissutigissavaa.

Nunat Avannarliit Killiit Aningaasaateqarfiata ingerlatsinera unammilleqatigiinnermut kipusoortitsisinnaanerarlugu oqarneq ataatsimiititaliap imaaliinnarlugu isumaqatigisinnaanngilaa. Nunani Avannarlerni Killerni inuussutissarsiornermik tamatigoortumik unammillersinnaassuseqartumillu ineriartortitsinermik siuarsaanissaq aningaasaateqarfiup maleruagassai malillugit siunertaavoq. Tamanna suliniutit suliffeqarfinnut mikinerusunut akunnattumillu angissusilinnut attuumassutillit taakkunungaluunniit iluaqutaasussat ingerlanneqarnissaannut taarsigassarsisitsinikkut tapiissuteqarnikkullu kiisalu qularnaveeqqusiinikkut pissaaq. Tassunga atatillugu Nunani Avannarlerni Killerni kiisalu Nunat Avannarliit Killiit Nunallu Avannarliit akornanni suliffissuaqarnikkut teknikikkullu suleqatigiinnermut aningaasaateqarfik tapeeqataasassaaq.

Aallaaviusutut isigalugu aningaasaateqarfik aningaaserivinni atugassarititaasut malillugit taarsigassarsisitsisarpoq qularnaveeqqusiisarlunilu. Pissutsilli tunngavissaqalersippassuk atugassarititaasut pitsaanagerusut atuutsinneqarsinnaapput. Aningaasalersuineq niuernikkut atugassarititaasut nalinginnaasut kisiisa malillugit pissappat inuussutissarsiutinik siuarsaalluni suliniut piviusunngortinneqarsinnaanngitsoq tamatumani pineqarsinnaavoq. Pisuni taamaattuni inuussutissarsiornermik assigiinngisitaarnerusumik pilersitsinissamat aningaasaateqarfik peqataaqataasarpoq, taamaalillunilu inuiaqatigiinnut atuisunullu iluaqutaasumik ungasinnerusoq isigalugu unammillernerup annertunerulerneranik pilersitsisarluni. Aallarnisaasunut nutaaliortunullu tapiissuteqariaatsini allanisulli aallarnisarnermi pitsaanagerusumik atugassaqtitsinikkut unammilleqatigiinnermut

kipusoortitsisinnaasut akuerineqartarput. Taamaaliortoqartarpoq ungasinnerusoq isigalugu inuussutissarsiornermi aqqissuussaankkut unammilleqatigiinnermilu pissutsitigut iluaqutissarsisoqaqqullugu.

Aammattaaq aningaasaateqarfimmi aningaasaatit ilarpasui nunani avannarlerni Danmarkimi, Norgimi, Sverigimi Finlandimilu suleqatigisartakkatsinneersuusut ataatsimiititaliap maluginiarpaa. Akileraarutit akitsuutillu aqutugalugit nunani avannarlerni killerni inuussutissarsiutinik ineriartortitsinnermut aningaasaateqarfiup akileeqaataassutaasa landskarsinut ataasiakkaanut toqqaannartumik iluaqutaassamik ikilisinneqarnissaat nunanit taakkunanit kissaatigineqanngimmat pissusissamisuuinnarpoq.

Pappiaqqanik nalilinnik naqissusiinermi akitsuut pillugit inatsimmik 1987-imiilli arlaleriaqaluni allanngortitsinerit eqqarsaatigalugit akileraartarnermut akitsuusiisarnermullu naalakkersuisoqarfiup suliassaqarfimmi iluani inatsisit ingerlaavartumik iluarsaanneqartarnissaat isumagimmagu Akileraartarnermut Akitsuusiisarnermullu Ataatsimiititaliap iluarisimaarlugu maluginiarpaa. Tamatumali peqatigisaanik allanngortitsinissamik tullianik pisariaqartitsisoqalerpat periarfissaq iluatsillugu pappialanik nalilinnik naqissusiinermi akitsuut pillugit inatsisartut inatsisissaattut siunnersuummik ataatsimoortumik saqqummiussisoqarnissaa ataatsimiititaliamit kissaatiginartinneqarpoq.

Akilaartarnermut Akitsuusiisarnermullu Ataatsimiititaliap inassuteqaataa.

Siuliani allassimasutut oqaaseqaateqarluni Inatsisartut aappasaaneerinnermini siunnersuut saqqummiunneqartoq taama iluseqartillugu akuersissutigissagaat Akileraartarnermut Akitsuusiisarnermullu Ataatsimiititaliap isumaqatigiittup inassutigaa.

Taamatut oqaaseqarluni Akilaartarnermut Akitsuusiisarnermullu Ataatsimiititaliap siunnersuut Inatsisartunut aappasaaniigassanngortippaa.

Kristian Jeremiassen
Siulittaasoq

Ole Thorleifsen

Ruth Heilmann

Juliane Henningsen

Lene Knüppel

